

Regional News Unit AIR Aizawl
Friday, August 01, 2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Vawiin atang hian Aizawl khawpui chhunga lirthei tlan dan tih danglam tan a ni.
- Pan -India Rescue and Rehabilitation Campaign 3.0 hnuaiah Lunglei Municipal Area ah naupang hnathawk a chhawr luih hmuh tur an awm lo.
- Akashvani Aizawl din kum 60-na lawm tan a ni.
- Union Cabinet chuan Central Sector Scheme Grant in aid to National Cooperative Development Corporation (NCDC) atan cheng vaibelchhe 2000 kum 2025-26 atanga 2028-29 chhhung hman tur a pawm.

<><><>

TRAFFIC SP

Vawiin atang hian Aizawl khawpui chhunga lirthei tlan dan tih danglam tan a ni a,

Aizawl Traffic Sr. S.P Ruatsanga Ralte sawi danin lirthei intlanchhawk dan tih danglam avangin lirthei veivak a pung dawn a, hemi avang hian a hmun lova lirthei hung te vai turin Aizawl Municipal Corporation leh Traffic Police tangkawpin Flying Squad an din a ni.

Byte: Aizawl Traffic Sr. S.P Ruatsanga Ralte

Aizawl Traffic Sr.SP Ruatsanga sawi danin lirthei intlanchhawkna chu AMC area pumpui ni tawh lovin; Bawngkawn leh Kulikawn inkar main road: Chaltlang leh Ramhlun peng, Bangkawn atanga Kulikawn (Ngaizel, Tlangnuam leh Pika Road peng thleng) inkar via Chaltlang/ Ramhlun (Laldenga Road) - Chanmari - Lower & Upper Zarkawt - Dawrpui - Upper Khatla - Sikulpuikawn - Kulikawn, Sikulpuikawn leh Khatla inkar: Sikulpuikawn atanga MINECO peng (Marova Point)/ 23 sector A.R gate bul theng via Peter Street, Khatla, Khatla leh Vaivakawn inkar: Khatla Kawn atanga Vaivakawn Taxi Stand, Bazar Bungkawn peng thleng via Temple Square-ah te zing dar 9 leh a chanve atanga tlai dar 6 thleng a taka hman tan a ni tawh dawn a, Lirthei intlanchhawk hian Inrinni, Pathianni leh Sorkar chawlh te a huam lo a, kawngpui dung tarlan loh zawngah chuan a tlan theih vek tawh dawn a, hetihlai hian lirthei No Entry period nei hrangte erawh a huam lo thung tih a sawi a ni.

Taxi (LMV leh Two-Wheelers) te chu Group 5- A, B, C, D leh E ah then an ni dawn a. Kar khat chhungin group tinin nikhat zel tlan loh ni an nei ang a. Taxi intlanchhawk hian Thawhtanni atanga Zirtawpni apíangin zing dar 09:30 atanga dar 6:00 inkar a huam dawn a. Taxi intlanchhawk hian Inrinni leh Pathianni te a huam lo thung a ni.

<><><>

CM

Sairang Rel station hawn hun tur leh Mizoram chhim lama rel kawng kal zel tur chungchang sawiin Chief Minister Pu Lalduhoman a office-ah NF Railway (Construction) General Manager Pu AK Chaudhary leh a thawhpuite nimin khan a kawm a,

Sairang rel station hawng tur hian Chief Minister hian Prime Minister Pu Narendra Modi a sawm a, theih anga lo inbuatsaih lawk ni se an ti a, Union Railways Minister-in a lo tiam tawh ang a, Sairang rel station chu World Class-a siam chhoh zui dan tur leh Rajdhani Express a rang lama tlantir nghal dan tur te pawh an sawi dun a ni.

Pu Chaudhary hian, tunah hian rel kawng leh Station te hi chu hawn theiha peih a ni tawh a. Amaherawhchu Sairangah Secondary Maintenance Facility Centre for Coaches chu an sa leh mek a. Hei hian thla khat leh a chanve vel a awh dawn avangin sak zawh hun hi central lam chuan an rawn ngaichang leh mai thei, tiin an hmalakna kal mek te Chief Minister hi a hrihl a ni.

<><><>

LUNGLEI CHILD LABOUR

Pan -India Rescue and Rehabilitation Campaign 3.0 hnuaiah Naupang hnathawk a chhawr luih an awm leh awm loh Lunglei Municipal Area ah nimin khan dapchhuah a ni a, Naupang hnatahwk a chhawr luih hmuh tur an awm lo a ni.

He Pan India Rescue and Rehabilitation Campaign hi National Commission for Protection of Child Right (NCPCR) in July ni 22 khan ram pum huap a hman turin a lo hawng tawh a, he campaign hian naupang tih duhdah na tuar te, chhawr luihna leh rukbo tuartute chhanchhuah a, chhawmdawl na pek a tum a ni.

Campaign hi District Task Force on Child Labour thukhawm Lunglei Bawrhsap hova neiin bawhzui tura ruahmanna a lo siam angin District Child Protection Unit, Lunglei WCD a thawktu te chuan hmun hnihah inthenin naupang hnathawk a chhawr luih leh venhim ngai an awm leh awm loh Lunglei khawchhung mai bakah Bualte thlengin Thingpui dawr te, Workshop leh hnathawhna hmun hrang hrangah te kal chilhin hun an hmang a ni.

<><><>

AIR 60TH

Akashvani Aizawl din kum 60-na lawmna nimin khan Akashvani Aizawl Multipurpose Hall Tuikhuahtlangah tan a ni.

He hun hi Akashvani leh Doordarshan Additional Director General (Northeast Zone) Pu Ashish Bhatnagar an a hmanpui a, thusawiin Pu Bhatnagar-a chuan khawvel thangchho zelah radio hlutna a tlahniam chho a, mi chuan khawl chakna nen a tehin a a damkhawchhuah an ring lo a, chutih laiin President in thusawi nan a rawn hmang a, Prime Minister Narendra Modi-an Maan Ki Baat kaltlangin mipui hnena thuchah sawi nan a hmang chho a, Radio hlutna an rawn thlang ve leh chat hi a ropui hle a ni a ti. Akashvani chu mi te hnu chhui a, khawvelin a beisei ang petu ni lovin, a din chhan leh a tih tur diktak, mipuite hnena thudik leh thutak puang tura hmalatu a ni zawk a ni a ti.

Akashvani Aizawl Director leh Mizoram Cluster Head Pu DR Lalropuia pawhin thu a sawi a, chuan Akashvani Aizawl chu kum 1966 July ni 31-ah Assam sorkar hnuaiah district AIR Station anga bul tan a nih thu leh chumi atang chuan hma a sawn chhoh ve hret hret thu a sawi a. Vawiinah chuan nasa taka thangin mipuite rawngbawlin kum 60 lai a lo tling ta a ni a ti.

He hunah hian Radio hluttu leh ngaithlatu langsar zinga thusawitu, Govt Mizoram Law College Principal pension Dr Rualkhuma Colney pawhin thusawiin, Akashvani chu Mizo tawng leh nunphung vawnghimtu a ni a ti a, Mizo Language Development Board member a nih ang pawhin, Akashvani an hlut tih a sawi a, Mizo tawng chu thluk nei anih avangin a thluk leh lam dan dik tak vawnghim tu a ni a ti a ni.

Ngaithlatu leh thusawitu langsar dang Zemabawk Higher Secondary School Lecturer Pi Lallianvungi pawh he hunah hian thusawiin, zing ka thawh velah chokaa ka radio hun hi ka on nghal a, mobile phone-a ngaihtlak theih a nih hnuaah phei chuan school ah thlengin radio programme hi a ngaithla thin tih a sawi a, tuna hmeichhiate pual bik leh ‘duh duh sawi theihna programme an tihchhuah te chu a hlut zual hle thu a sawi a ni.

Tun dinhmunah Akashvani Aizawl ah hian thawktu mi 170 an awm mek a, a ngheta thawk mi 50 leh a nghetlo a thawk mi 120 an awm mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

VATHUAMPUI

Lawngtlai District Vathuampui chuan Rural Development Block an neitheih nan nimin khan Pathian hnenah khawtlang huapin an tawngtai.

Khawtlang huapa tawngtaihona YMA Halla neih hi RD Block Demand Committee Vathuampui Chairman Pu CK Sangan kaihruiin, Kohhran hruaitute kaihruiaina in tum li an tawngtai a, Rural Development Block an neitheih nan a hmalakna kalpui tawh dan te sawilan a ni bawk.

Kan corr report lo ngaithla ang

Vathuampui Rural Development Block, Demand Committee hian kum 2000 atang tang tawh khan Vathuampui Block hawn a nihtheih nan State Sorkar ah ngenna vawi engemawzat an lo thlen tawh a, a hunlai angzelin Sorkar inthlak chhohvah pawh RD Block an dilna hi chawlhsan lovin a theih ang angin an bawhzui chho zel a, tuna ZPM Sorkar ah pawh helai bialin hmasawwna nasa zawk an neihtheih beiseiin RD Block hi dilchhonzawm nise tiin, an hmalaknate thuangtaka an kalpui theih nan Pathian hnena dilna hun khawtlang huapin an buatsaih a ni.

<><><>

BAIRABI LAND OWNERS

National Highway-154 siam mek a zangnadawmna la hmu velo mi 34 te intelkhawmna Land Owners Association, Bairabi chuan Compensation an hmuh theih loh avangin nimin khan Kawng dan an tum a, thuneitute nen an in biak hnuah thla thar August ni 15 thleng nghak leh tura PWD hotuten an ngenna chu pawm in, sorkar hmalakna ngaihchan leh phawt nise, an ti.

Assam Hailakandi District atanga lo lut NH-154 hian Bairabi - Meidum - Pangbalkawn Saihapui K - Bukvannei - Buhchangphai khua te paltlang in Bilkhawthlir ah a lut chho a. He Kawngpui an siam tan tirh atanga tun thlengin Bairabi khua a cheng chhungkaw 34 te chuan Kawngpui in an ram a tih chhiat man Zangnadawmna hi an la hmuh loh avangin hun rei tak atang tawhin sorkar thuneitu hrang hrangte nen an indawr tawh thin a, nimin thlenga hlawhtlinna anla hmuh loh avangin lungawilohna lan tir an tum ani. Lungawilohna lan tir an tumna hmunah hian sorkar hotute nen inkawm, sorkar thuneitute ngenna chu an ngaichang leh rih dawn a, August ni 15 thlenga hlawhtlinna an hmu lo anih chuan a tul anga hmalak leh nise, an ti ani.

Kawngpui laih tan hun kum 2006 khan Compensation pek vek tawh angin Ministry of Road Transports and Highway (MoRTH) chuan an hria a, mahse, pek hmaih chhungkaw 34 la awm te chuan tun thleng hian Compensation hi an la dawng ve lo ani.

<><><>

UNION CABINET

Union Cabinet chuan Central Sector Scheme Grant in aid to National Cooperative Development Corporation (NCDC) atan cheng vaibelchhe 2000 kum 2025-26 atanga 2028-29 chhhung hman tur a pawm. Union Information and Broadcasting Minister Ashwini Vaishnaw chuan New Delhi-a chanchinbumite a kawmnaah he thu hi a sawi a. Union Cabinet chuan Pradhan Mantri Kisan Sampada Yojana atan 15th Fianance Commission chhungin cheng vaibelchhe 6520 hman a remti bawk tih a sawi a. Cheng vaibelchhe 1000 chu Integrated Cold Chain and Value Addition Infrastucture ICCVAI hnuaiah Multi Product Food Irradiation Units 50 dinna tur a tel a. Heng bakah hian Food Safety and Quality Assurance Infrastructure, FSQAI. hnuaiah Food Testing Labs 100 dinna tur a tel thu a sawi bawk.

Hei bakah hian Maharastra, Madhya Pradesh, West Bengal, Bihar, Odisha leh Jharkhand huamchhungah district 13 tan tlanga cheng vaibelchhe sing 1 sang 1 leh 169 senga relkawng siamna tur project pawh pawm a ni a. Kum 2028-29 ah he project hi zawh fel tur niin hna thar nuai 229 chuang a siam belh dawn a ni.

<><><>

MYANMAR

Myanmar National Defence and Security Council,NDSC chuan Union government leh State Security and Peace Commission an din thu an puang. Myanmar Radio leh Television lama an puan danin Union Government hi Prime Minister U Nyo Saw chuan a kaihruai a.State Security and Peace Commission chu Senior General Min Aung Hlaing chuan a kaihhruai dawn a. NDSC hian Defence Service Commandr-in-Chief hnenah thuneihna pumhlum pekna pawh a titawp a.

Myanmar State Administration Council thupuangtu Zaw Min Tun chuan NDSC chuan state of emergency titawpin rampum huap inthlanpui buatsaih a tum thu a sawi a ni.

<><><>